

বায়'আতের গুরুত্ব

বায়'আত আরবী শব্দ। এর অর্থ- অঙ্গীকারবদ্ধ হওয়া, অনুগত হওয়া, ক্রয়-বিক্রয় করা প্রভৃতি।

সত্যিকার পীর ও মুরশিদের নিকট বায়'আত গ্রহণ করার অর্থ হলো- পীর ও মুরশিদের নিকট আল্লাহ তা'আলাকে পাওয়ার সাধনায় অঙ্গীকারবদ্ধ হওয়া, কুরআন-সুন্নাহ মোতাবেক জীবন পরিচালনার ক্ষেত্রে তাঁর অনুগত হওয়া এবং আত্মবিলীনের জন্য তাঁর নিকট বিক্রি হয়ে যাওয়া (অর্থাৎ বিনাশর্তে পীরের সকল আদেশ মাথা পেতে নেয়া)।

❖ আল্লাহ তা'আলার পথে সাধনার জন্য খাঁটি পীর ও মুরশিদের নিকট বায়'আতের গুরুত্ব অপরিসীম। মানুষের হিদায়াতের জন্য আল্লাহ তা'আলা যুগে যুগে নবী-রাসূলগণকে পৃথিবীতে প্রেরণ করেন। তাঁরা মানুষদেরকে আল্লাহ'র রাস্তায় অবিচল থাকার জন্য বায়'আত গ্রহণ করেন। যেমন, পবিত্র কুরআনে আল্লাহ তা'আলা ইরশাদ করেন:

□ দলীল- ১:

إِنَّ الَّذِينَ يُبَايِعُونَكَ إِنَّمَا يُبَايِعُونَ اللَّهَ يَدُ اللَّهِ فَوْقَ أَيْدِيهِمْ فَمَنْ نَكَثَ فَإِنَّمَا يَنْكُثُ عَلَى نَفْسِهِ وَمَنْ أَوْفَى بِمَا عَاهَدَ عَلَيْهِ اللَّهُ فَمَسْئُوتِيهِ أَجْرًا عَظِيمًا

–“নিশ্চয় যারা আপনার নিকট বায়'আত বা মুরীদ হচ্ছে, বস্তুত তাঁরা আল্লাহ পাকের নিকটই বায়'আত বা মুরীদ হচ্ছে; আল্লাহ তা'আলার কুদ্রতী হাত তাঁদের হাতের উপর রয়েছে। যারা এই অঙ্গীকার ভঙ্গ করবে, অবশ্যই সে তার ক্ষতির জন্যেই করবে। আর যে আল্লাহ পাকের সাথে বায়'আত হওয়ার অঙ্গীকার পূর্ণ করবে, অতিসম্পূর্ণ তিনি মহা পুরস্কার দান করবেন।” (সূরা ফাতহ: ১০)

□ দলীল- ২:

لَقَدْ رَضِيَ اللَّهُ عَنِ الْمُؤْمِنِينَ إِذْ يُبَايِعُونَكَ تَحْتَ الشَّجَرَةِ فَعَلِمَ مَا فِي قُلُوبِهِمْ فَأَنْزَلَ السَّكِينَةَ عَلَيْهِمْ وَأَثَابَهُمْ فَتْحًا قَرِيبًا

–“নিশ্চয়ই আল্লাহ পাক ঐ সকল মু’মিনগণের প্রতি সন্তুষ্ট, যারা গাছের নিচে আপনার হাতে মুরীদ হয়েছে, তাঁদের হৃদয়ের অবস্থা তিনি পূর্ব থেকেই জ্ঞাত। সুতরাং তাঁদের প্রতি প্রশান্তি নাযিল করলেন এবং অচিরেই তিনি তাঁদেরকে বিজয়ের তৃপ্তি দান করবেন।” (সূরা ফাতহ: ১৮)

❖ নবীগণের পর আল্লাহ তা’আলা তাঁর আপন বান্দাহগণকে আদেশ করেন, যেন তাঁরা ন্যায়পরায়ণ ওলীগণের আনুগত্য করেন। যেমন,

□ দলীল- ৩:

يَا أَيُّهَا الَّذِينَ آمَنُوا أَطِيعُوا اللَّهَ وَأَطِيعُوا الرَّسُولَ وَأُولِيَ الْأَمْرِ مِنْكُمْ

–“হে ঈমানদারগণ! তোমরা আল্লাহ তা’আলার আনুগত্য করো এবং রাসূল সাল্লাল্লাহু আলাইহি ওয়া সাল্লাম-এর আনুগত্য করো এবং তোমাদের মধ্যকার ন্যায়পরায়ণ ওলিউল্লাহগণেরও (আনুগত্য করো)।” (সূরা নিসা: ৫৯)

□ দলীল- ৪:

يَا أَيُّهَا الَّذِينَ آمَنُوا اتَّقُوا اللَّهَ وَكُونُوا مَعَ الصَّادِقِينَ

–“হে ঈমানদারগণ! তোমরা আল্লাহ তা’আলাকে ভয় করো এবং সত্যবাদী তথা আল্লাহ’র ওলীগণের সঙ্গী হয়ে যাও।” (সূরা তাওবা: ১১৯)

❖ মূলত খাঁটি পীর-মুরশিদের হাতে বায়’আত গ্রহণ করা আল্লাহ তা’আলাকে পাওয়ার এক অন্যতম ওসীলা বা মাধ্যম। এই ওসীলার পথ ধরেই আল্লাহ তা’আলাকে পাওয়ার সাধনা করতে হয়। এ ব্যাপারে আল্লাহ তা’আলা নিজেই ইরশাদ করেন:

□ দলীল- ৫:

يَا أَيُّهَا الَّذِينَ آمَنُوا اتَّقُوا اللَّهَ وَابْتَغُوا إِلَيْهِ الْوَسِيلَةَ وَجَاهِدُوا فِي سَبِيلِهِ
لَعَلَّكُمْ تُفْلِحُونَ

—“হে ঈমানদারগণ! তোমরা আল্লাহ্ তা‘আলাকে ভয় করো এবং তাঁকে
পাওয়ার জন্য ওসীলা (মাধ্যম তথা খাঁটি শায়খ বা পীর) তালাশ করো
এবং তাঁর পথে সাধনা করো, যেন তোমরা সফলতা লাভ করতে পার।”
(সূরা মায়িদা: ৩৫)

সুতরাং উক্ত আয়াতসমূহের উপর আমল করে খাঁটি পীরের হাতে
বায়‘আত গ্রহণ করে আমরা যেন আল্লাহ্ তা‘আলার নৈকট্য অর্জন
করতে পারি। আল্লাহ্ তা‘আলা আমাদেরকে তাওফিক দান করুন।
আমীন।